

所受各異不同如此受諸福報皆由洗浴聖

衆得之耳佛說經已阿難白佛言當何名此

經以何勸誨之佛告阿難此經名溫室洗浴

衆僧經諸佛所說非我獨造行者得度非神
授與求清淨福自當奉行佛說經竟者域眷

屬聞經歡喜得須陀洹道禮佛求退嚴辨洗
具衆坐大小各得道跡皆共稽首禮佛而去

佛說溫室洗浴衆僧經

佛說菩薩行五十緣身經

西晉三藏法師竺法護譯

佛在羅閱祇者闍崛山中時與比丘僧千二
百五十人比丘尼優婆塞優婆夷諸天龍鬼
神無央數十方諸來菩薩十萬人皆自然師
子七寶蓮華上坐十方諸菩薩見佛端正無
比身有三十二相八十種好座中有一菩薩
名舍那尸利語文殊師利菩薩言仁者知深
經能自知佛何因緣莊嚴其身得功德如是
乎十方諸菩薩聞是言莫不歡喜文殊師利

即起前長跪白佛言座中諸菩薩中有已得阿惟越致者中有未得阿惟越致者皆見佛身有三十二相八十種好莊嚴其身端正無比何因緣得是乎願佛爲諸菩薩說前世所作功德諸菩薩聞之當益增功德佛言善哉

經一

善哉文殊師利發意問乃爾乎佛言聽我說前世作功德菩薩世世所重愛珍奇好物持施與人常持好眼善意施與用是故佛悉得智慧知諸經法菩薩世世持采女珍寶莊飾持善意以施與人用是故得佛聲萬種聲出

菩薩世世常以好願善意視世間人用是故人民見佛視無厭極譬如月十五日盛滿姝好視之無有厭菩薩世世爲人說經法不從有所希望趣使得安隱而已用是故佛說經時人聞無有厭飽者菩薩世世不說人惡有惡者亦不爲他人說用是故塵垢不著佛身菩薩世世常受毀辱雖有筋力皆悉忍之用是故佛行地高者爲下卑者爲高菩薩世世見人窮厄給足與之見人破壞安隱令在職用是故佛行道時地爲現威神如喜狀菩薩

世世不作弓弩刀兵使人相害用是故佛行時荆棘瓦石丘墟皆自辟除菩薩世世從師所聞法不敢犯缺用是故佛所行事悉真足如是菩薩世世喜然燈於佛寺及師父母前人有狐疑輒用解之用是故佛身光明焰出殊好無有比威神巍巍乃如是菩薩世世若見奴婢說經不可止令斷身復聽之用是故佛說經無有躡誤菩薩世世不持惡目視人設有瞋恚稍稍忍之用是故佛眼不大不小引長好人有見佛無不歡喜者菩薩世世見

他人端正婦女不持姪意向之用是故佛身顏色殊好無比人有見者莫不歡喜菩薩世世隨時熟果及好香華持上佛比丘僧師父母用是故果樹華見佛無不曲傾向佛菩薩世世見丘墟惡道改令平正見無橋梁爲作橋梁不以錢財故恐迫人用是故佛所入卑門爲大菩薩世世見閑空無井樹之處爲種樹作井及諸飲食令人得食用是故佛所行處地爲出泉水出於八味菩薩世世見人行步出入不說其惡用是故佛身悉殊好無瑕

穢菩薩世世持雜香塗佛身持善意施佛及上塔用是故諸天人作香風之香持供養佛菩薩世世持雜香水與佛及諸菩薩澡面及楊枝疏齒用是故佛面口中皆香譬若發藏之穢菩薩世世見人有瞋恚意向菩薩常以善意待之用是故佛行道時足下有蟲蟻無不得安隱者威神巍巍乃如是菩薩世世所有國土及好香華衣被持施與佛用是故有人散華著佛上便成華蓋菩薩世世不壞人宅舍常喜作舍用是故佛協金剛之力四方

如山無能害佛身者菩薩世世見人有飢渴者先飯食之却爲說經用是故佛所止前皆有香華流水菩薩世世人從有所求索有者即與無所愛惜用是故佛說經時人聞之無有唐苦者皆有所益是故佛降伏諸魔菩薩世世持好音樂樂於佛及塔用是故佛爲諸弟子說經滿一佛界中人悉徧聞之菩薩世世作金銀雜寶樹上佛用是故諸天龍鬼神無有能見佛頂上者菩薩世世作佛塔持雜香塗之用是故佛所行處珍寶香華爲散佛

上菩薩世世見人有中毒輒持慈心往喻用是故佛所行處若人若樹中毒悉去之菩薩世世常隨經法不犯心常柔軟忍辱於人用是故有人狂亂來至佛所莫不得安隱者菩薩世世常持若干種香供養佛舍利及塗塔用是故佛身無有臭處瑕穢之惡殃禍不能及佛身佛威神巍巍乃如是菩薩世世見人有疑亂若爲鬼神所持輒往救之使得度脫用是故佛所向處若地有蟲蟻悉爲除去菩薩世世事師父母若見卧睡不數駕覺若欲

便覺當持音樂若持好語誦經往覺之用是故佛在內默聲諸天梵釋持音樂香往覺之菩薩世世爲佛作精舍好持牀卧具什物用是故蚊蟲蜂蛇蠚蟲之屬不敢近佛身菩薩世世寒冬之時爲佛諸菩薩作細靡之衣用是故隨藍風起在佛前不寒不熱亦不動衣毛菩薩世世有奇異美飯食終不獨食若師父母有飯食不減損而食之用是故佛捨置威神力雖無所食佛亦不飢渴身亦不羸菩薩世世不放火於山野并除他人三毒用是

種一

十五

故佛般泥洹後火雖盛熾不能令佛變色菩薩世世常上師父母及有道德人上貴舍宅衣被飲食有從乞者給與之用是故諸天及鬼神諸長者持世間所有珍寶什物以上佛菩薩世世爲佛治道徑持澤香塗地用是故佛行道時諸好雜華行列散地上菩薩世世持戒未曾有犯時亦不教他人犯用是故隨藍風四面起不能動佛一毛菩薩世世爲佛於佛道中施五色慢於下請飯佛及比丘僧用是故佛所行處諸天張五色幔隨佛而行

佛威神巍巍乃如是菩薩世世持珍寶履屣以善意與佛用是故佛經行時足去地四寸不蹈地其相文爲現菩薩世世持幢旛華蓋雜種五色持用上佛塔用是故自然生雜色幢旛蓋隨佛而行菩薩世世爲佛治道以雜香汁用灑地用是故佛所行處諸龍持雜香汁灑地菩薩世世不曾說不淨人所諱語設有是語當意制不作用是故諸天龍神飛鳥不過佛上菩薩世世見佛若比丘僧來至扶迎爲佛作禮用是故佛所行處諸天釋梵阿

須倫鬼神世間人民莫不迎佛持頭面著佛足者菩薩世世常護身口意不犯衆惡不但用身故爲十方天下人施用是故菩薩在母腹中時臭處惡露不著身常安隱不恐怖亦無有燒者菩薩世世持善意視佛見怨家見父母心正等無有異用是故佛智慧悉具足但爲衆善無有惡人有疑難問佛無不解者菩薩世世持諸音樂雜香華供養佛及塔用是故佛入城時城中諸音樂不鼓而自鳴菩薩世世持無梨弊結金銀珍寶附憚持用上

佛及塔諸菩薩比丘僧及世間人悉布施與之常持和顏悅意與共語用是故佛行分越時卑戶爲高菩薩世世爲佛施軒交露令佛住行其下持善意視佛復讚歎佛之功德用是故佛放光焰日月星辰皆冥無能當佛光明者佛威神巍巍乃如是佛言我前世爲菩薩時世世所行如是無數世人故粗說少少功德耳我從無數世以來所有財產知非常是故持施與人我世世所作功德如是釋梵天人所不能作是皆前世所行功德所致

虛空尚可度須彌山尚可稱海水尚可量佛

所作功德行累劫億世說之不可稱不可量

若有人至意念佛功德者其福無量況爲作禮嗟嘆者哉人有欲求佛者作功德行亦當如是佛說經已諸菩薩及諸天人皆歡喜前

組一

以頭面禮佛而去

佛說菩薩行五十緣身經

佛說菩薩修行經

西晉河內沙門白法祖譯

聞如是一時佛遊舍衛國祇樹給孤獨精舍與大比丘千二百五十及衆菩薩五千人俱皆尊菩薩神通叡達權慧變化遊于三世導利一切莫不蒙濟於時舍衛國大城之中有豪長者名比羅達此言威施與其城中諸大長者五百人等宿意同念俱從舍衛大城中出往詣祇樹給孤獨精舍前至佛所即皆稽首繞佛三匝問訊世尊却坐一面於時世尊以無